

清·方略館 編

清代 方略 全書

北京圖書館出版社



清代方略全書

—〇〇—

清·方略館編

北京圖書館出版社

清·曹振鏞等撰

欽定平定回疆剿擒逆裔方略

卷四八——六二

清道光刻本

欽定平定回疆勦擒逆裔方略卷之四十八

道光七年秋七月己酉

允楊遇春暫緩進關

嚴勅將軍衆贊等迅速擒逆籌議凱撤事宜

長齡楊遇春武隆阿楊芳奏言前因首逆張格
爾被達爾瓦斯伯克沙伊布拉依木引赴該處
地方當令色勒庫爾伯克邁瑪特沙會同什克

南伯克庫布特帶領回兵徑赴達爾瓦斯曉諭
該伯克卽速擒獻並飭葉爾羌署阿奇木伯克
阿布都爾滿選派七品伯克阿瓦斯等十四名
趕往幫同辦理嗣據差往卡外探信之回子玉
努斯帶同通布倫布魯特比阿布都拉依差人
回營稟報探得張逆現在達爾瓦斯之藏基地
方藏匿臣楊遇春又飛諭拔達克山伯克亦卽

派令回兵於相通達爾瓦斯要隘地方幫同截
拏惟查色勒庫爾前途路徑險隘叢雜若令大
兵前進後路糧運維艱是以臣楊遇春卽於色
勒庫爾暫行駐劄派令副將胡超挑帶奮勇官
兵一千名趕緊跟進督催速辦臣長齡武隆阿
現亦札致楊芳以駐兵阿賴距浩罕較近應須
加意撫綏令將首逆上緊緝拏家屬妻子卽行

送出一面挑派得力官兵帶同通布倫布魯特
比卽赴藏堪一帶偵蹤掩捕恐該逆聞風復竄

臣等已選派民人李得材並能事伯克達爾瓦
斯前赴布噶爾檄諭該伯克等一體擒拏計須
旬日內外方能接到信息至

臣

楊遇春昨奉

諭旨飭將應撤官兵先行督押進關惟於未經奉

旨之先業已帶兵出卡未便遽行撤回楊遇春應請

暫緩起程其英吉沙爾等三城現蒙

簡派署理辦事領隊大臣各員達凌阿本在葉爾羌
帶兵駐守業已行知遵照總兵成玉頭等侍衛
蘇清阿現隨楊遇春楊芳帶兵出卡副都統巴
哈布前已奏明仍回喀喇沙爾本任茲奉

諭旨已行知該副都統卽日亦可到營查該三城自
克復以後搜除餘賊撫綏回衆情形已極靜戢

現奉

恩旨復將八城應徵上年本年糧石貢賦等項普予

豁免業經恭刊謄黃通行曉諭該回衆等感戴

皇仁鼓舞歡欣更臻安堵該總兵成玉等亦請暫緩

飭令赴任且_臣等前於籌議善後摺內曾經奏

請將來西四城酌留官兵後擬將辦事領隊大

臣各缺概行裁撤俟奉到

諭旨如仍應照舊安設再於從征各員內確擇人地
相宜堪勝回城辦事人員另行據實密奏恭候
簡用至應行酌撤官兵除後路各處業經節次分起
奏撤外其前路官兵查楊遇春楊芳兩路出卡
共陸續帶往八千六百餘名其餘九千餘名駐
劄喀什噶爾茲臣等公同商酌應將京營健銳
營官兵二百餘員名派令容照奕山管帶入關

其西安滿洲營官兵五百餘員名一併減撤回營以節糜費其餘東三省川省各官兵隨後再行陸續酌撤惟該官兵等應支鹽菜駝折馬乾等項銀兩查後路先後撥解以及各糧員自內地原領並阿克蘇商民兌匯等項統計軍營共收餉銀二百萬兩零二萬八千餘兩除在阿克蘇烏什等處採買糧料牛羊馬匹暨克復喀什

噶爾後就近購辦糧石各項支用外餘皆按例
支給官兵嗣因餉銀未能隨時解到尙有未發
各營鹽菜等銀多寡日月不等業已節次飛催
後路趕緊撥解其先撤官兵短支銀兩飭令進
關後歸入軍需局截數找發以清款項再前奉

諭旨令

臣

等將和闐一路出力官兵覈實保奏茲將

克復和闐及

臣

楊遇春由葉爾羌派令副將胡

超帶兵前往色勒庫爾卡外勦辦逸賊左霍爾
等並哈朗阿余步雲等由和闐跟追賊目玉努
斯節次打仗奮勇之馬步官兵以及三路接運
軍火糧餉文員詳細查明分別保奏伏候

恩施又和闐被害之大阿渾穆圖巴拉現亦遵

旨查明該阿渾尚有次子玉素樸年二十八歲向習
經典願充阿渾三子土敏爾年十九歲其餘那

蘇普拉薩都拉沙木斯等二名年皆幼小可否

將土敏爾

賞給六品頂帶之處恭候

恩旨祇遵奏入

上命軍機大臣傳諭曰自六月十六日接到長齡等
奏報業已兩旬朕時切懸盼及至昨日申刻據長
齡等由六百里加緊奏報急行拆閱尙非獲逆喜

音覽奏曷勝憤懣計自喀什噶爾克復以來距今五月之久每有奏陳該逆竄逸地方及偵探追捕情形總不過藉詞支吾辦理全無把握如果實有該匪藏匿地方飭派官兵回兵跟捕又得各部落幫同截拏何至今逆裔此拏彼竄現計出卡官兵已八千六百餘名聲威不爲不壯若不趁此天時未寒設法卽日成擒轉瞬大雪封山官兵等豈能

久駐卡外竟成海捕縱該逆以釜底游魂斷不能
復肆猖獗亦恐師出無功轉令外夷輕視且此數
月之久虛糜帑項不可勝計若再虛詞搪塞日復
一日不惟卡外轉餉綦難豈能以無數帑金盡輸
荒徼該將軍等必須前後熟籌立定主見斷不容
任意遷延重取咎戾楊遇春旣已帶兵出卡正當
督拏喫緊之時卽著暫留在彼俟得捷音再遵照

前旨先行進關至成玉蘇清阿現隨楊遇春等出
卡亦卽暫緩飭令赴任應否派員前往署理及達
凌阿等署理各城能否勝任著遵照前旨留心察
看據實奏聞其應撤火器健銳兩營官兵二百餘
員名西安滿洲營官兵五百餘員名卽著照議減
撤回營東三省及四川省各官兵前已降旨先行
裁撤著該將軍等酌量情形陸續撤令歸伍軍營